

289 *A dì 2 septembrio.* La terra, heri, niun di peste, et di altro mal numero 7.

Vene in Collegio l'orator del duca de Milan con lettere del suo signor duca da Lodi, zerca le bandiere de nostri fanti per intrar in Santo Anzolo etc. Et ringratiò de la licentia datoli de mandar oratori a Cesare.

Vene l'orator de Mantova, qual fo aldito con li Cai di X. Et se dice, el protonotario Carazolo, come orator de l'imperador è zonto a Verona, et vien de qui.

Vene l'orator del duca de Urbin, rechiedendo certa polvere et altro per defension del stato del duca, et portò lettere, el duca se duol non vien servito de quello bisogna a conservation del stato suo.

*Di campo, da Cassan, di sier Polo Nani proveditor zeneral, di 30.* Come era stà fatto el ponte per passar Adda et andar el campo a Seriate, a dì primo passeranno.

*Da Lodi, di sier Gabriel Venier orator, di 30.* Come hanno de li che l'imperador partiva a dì 30 de avosto da Zenoa et saria zuoça, che è hozi, a dì 2 in Piasenza, dove se li preparava alozamenti et umbrele d'oro de andarli contra et farli altri onori, *ut in litteris*. Et le zente soe, zoè li fanti, erano a la volta de Alexandria. Scrive de 300 fanti nostri doveano intrar in Santo Anzolo; et come el duca non vol intrar in Cremona, come li ha dito fazi el duca de Urbin, se prima el non ha le artellarie et monition da potersi tenir in castello. Scrive ringratia la Signoria de la licentia datoli de mandar oratori a Cesare, et cussì li ha per inviati domino Giacomo Filippo Saco . . . , et uno secretario nominato . . . . Gilim. *Item*, ha letere di Roma, di 25, come ritorna Zuan Agnolo Rizo suo secretario et orator, stato al papa; et il papa manda per suo orator dal dito duca lo episcopo Verulano. Scrive l'avisio hauto che di Zenoa l'imperador mandava una galla in Portogallo, la quale 15 galie del Doria l'accompagnava, poi tornavano a Zenoa; el qual Doria restava a Zenoa; et le galie de Napoli et de Sicilia erano stà licentiate da l'imperator tornaseno a le terre dove fo armate.

*Di Verona, di 31, hore . . . .* Come hanno, inimici haver butato el ponte heri a hore 22 a Dolzè, nel loco dove passorono l'anno passato, et haver passato l'Adese fanti 4 milia con pezi 20 artellarie, el resto è restati de là. Et tiensi certo a questa hora tuti sono passati. Heri scrisse erano fanti 8 milia, et cavalli 1500; hora, per avisi hanti dal marchese Spineta per uno partido del dito campo, dice sono

fanti 12 milia et cavalli 1500, artellarie pezi 26, zoè 4 grosse da bater de balote, de libre 60, el resto sono minute.

Vene in Collegio sier Zuan Pixani procurator, fratello del reverendissimo cardinal Pixani, dicendo, dito cardinal haver hauto uno breve del papa de andar a Roma, et vol partir fra 3 zorni: però supplica la Signoria sia posta la parte de darli el possesso del vescado de Trevixo. Li fo risposto se meteria el primo Pregadi.

In questa matina, el Collegio del Conseio di X 289\* deputato, et in loco de l'avogador Boldù introe sier Giacomo Semitecolo, si reduseno et examinorono sier Fantin Pixani de sier Vettor, et fo remandato in camera, et preseno de chiamar sier . . . da Molin, qu. sier Marco *da santa Marina*, et in la proclama dir la causa perche, per insulti fati con arme contra ufficiali et tolloli l'arma, et quello ferito, etc.

Da poi disnar, fo Pregadi, per terminar de le galie di viazi, se dieno andar.

*Di Raspo, di sier Zuan Erizo capitano, data a Pinguento, a dì . . . .* Avisa di certa incursion de turchi fata in Cragna, *ut in litteris*. La copia sarà qui avanti.

*Da Civial di Friul, fo lettere di sier Gregorio Pizamano proveditor, di . . . .* Con avisi *ut in eis*: el sumario di le qual scriverò qui soto.

Fu posto, per li Consieri, el possesso de l'abazia di la Verace Croce in Cipro a domino Giacomo Cocco . . . hauto dal pontefice etc. Andò in renga sier Stefano Tiepolo, è di la Zonta, qu. sier Polo per suo nepote sier . . . (Zuan) Corner di sier Fantin, per le raxon l'ha in dita abbatia. Et li rispose sier Alvise da Ponte el XL Criminal qu. sier Antonio per el Cocco. Andò la parte: 53 non sincere, 10 di no, 119 de la parte. Et *iterum* ballotata: 50 non sincere, 13 di no, 120 de la parte; non fu presa, la pende ancora.

Fu posto, per li Savi del Conseio et Terraferma et cassier, conzar il lotho, zoè possino tuor quelli haverano i bolletini bianchi tutti li debitori de officii fin questo zorno, *ut in parte*. La copia sarà scritta qui avanti. Fu presa. Ave: 171, 23, 3.

Noto. Da poi l'altra ultima parte, il lotho non ha scosso se non ducati 500 in zerca, et a la prima ducati 5 milia; siechè credo non se serarà mai.

Fu posto, per li Savi del Conseio et Terraferma, un' angaria a li burchii vien in questa terra, de pagar li grandi de stera 100, soldi 20, et quelli de li in zoso, soldi 10, *ut in parte*. *Etiam* la copia no-